

Oculus est naturæ speculum.

Quid iuvat aureolo procedere (Paula) capillo,
Et molles nitidâ veste mouere sinus?
Quid faciem velare tuam? quid fucus in illa
Pictorum tabulis qualis inesse solet?
Æqui uocat facies, falsos imitata colores;
Quô possis melius fallere, vela oculos.
Hos finxit natura, suas quasi fingere dicas
Ædes: hîc vires exerit, hîc habitat.
Quicquid clara sono diffundit lingua per aures,
Hoc tacitis oculus nunciat indicijs.
Quid Musas insane colis? nec proficis hilum?
Hoc oculus narrat; semper *ἀμύσος* eris.
Grandia quid loqueris Thraſo, quid lingua minatur?
Sunt tibi * parui oculi, Thraſo puſillus homo es.
Quid tu Cotta taces? sapiens vis Cotta videri?
Nulla in tam magno lumine mica ſalis.
Fortis is & sapiens, * *medii* cui dantur ocelli:
Nolo oculum nimium, Pannice, nolo parum.
Quid torvum aspectas; quid flammea lumina torques?
Hem fugio; hoc oculus ſuggerit, vt fugiam.
Anne natant oculi, limi, mobileſq; vagantur?
Virgo caue; hoc oculus prædicat, vt caueas.
Languescunt oculi, tu fingis gaudia! frustra.
Fingas vſq; licet, proditor eſt oculus.
Indignaris, amas, ludis, lætare, doleſne?
Quicquid agis, quicquid non agis, hoc oculus.

Ergo,

Non ſpeculum melius vultum faciemq; referre
Novit, quàm carnis lumina, mentis opus.

* Arist. phyſi-
ogn.

* Ibid.

Anima eſt tota in qualibet parte.

In toto quæ tota manet, mens filia cœli,
Manat ab incertâ notior illa domo.
Quam primam poſuit ſedem; quæ regia prima;
Concertet dubiâ garrula turba fide.
Quid cor, quid cerebrum nominas! num cernis ocellos?
Num caput, & linguam? num iecur, atq; pedes?
Ergo quid astringis ſedi vni? vbi tanta locorum
Copia, quid ſedes vna, vel vna domus?
Quidue animas ſtatuis plures? quid diuidis vnam?
Æterna eſt, *ἀμείψης*; partibus vna caret.
Tàm pedibus manibuſq; habitat, quàm pectore, corde;
In quibus æquali more, modoq; viger.
Fallis magne * pater; non inſtar regis in arce,
Aut nautæ in navi, ſpiritus ille regit.
Totus (vt vnus) ineſt in toto, & quolibet vno;
Totus alit totum, ſingula totus adit.
Fortior è cerebro ſpirat diuinior aura,
Quòd ſint plura illic organa, & apta magis.
Hinc pes nil cernit, tuus hinc nil audit ocellus;
Organa deſciunt; tota in vtriſq; anima.
Si non, nec vita eſt; animam niſi (vilis & excors)
Diuidi in humano corpore poſſe putas.

* Arist.